

欽定四庫全書

集部

別集類存目十一十二

國朝

12
130
109

海山閣
129

百九



113
1330
109

東學

欽定四庫全書總目卷一百八十四

所錢支
有拘邦

集部三十七

別集類存目十一

湖海集十三卷 山東巡撫探進本

國朝孔尚任撰尚任有節序同風錄已著錄尚任官

國子監博士時隨侍郎孫在豐在淮揚疏濬海口

因輯其入淮以後詩文自編此集故以湖海為名

幸跌草三卷 浙江巡撫探進本

國朝黃百家撰百家有體獨私鈔已著錄是集凡雜

欽定四庫全書總目卷一百八十四 集部 別集類存目十一

金定四庫全書卷一百一十四
文二十篇其序盧氏春秋三傳纂凡謂春秋之本
旨皆顯以示人無暗藏機括使人如猜謎射覆者
深得聖人作春秋之意其王劉異同序亦深見兩
家之闕奧大致頗肖其父但蒼老不及耳書首題
曰學箕五彙則卷帙尚多此其彙中之一種耳

眺秋樓詩八卷

浙江巡撫
採進本

國朝高岑撰岑字峴亭商邱人官豐城縣知縣其詩
每卷各爲集名終之以和月泉吟社田園雜興六
十首岑爲吏部尚書宋犖外孫故其詩法亦本於

犖與宋至緯蕭草堂集體格相近所謂酷似其舅
者也

赤嵌集四卷

兩淮馬裕
家藏本

國朝孫元衡撰元衡字湘南桐城人康熙中官至東
昌府知府是集皆其爲臺灣同知時所作以地有
赤嵌城故以爲名多紀海外土風物產頗逞才氣
而未能盡軌於詩律王士禛爲之點定謂其追蹤
建安躡跡長公似乎太過也

四香樓集四卷

江蘇巡撫
採進本

國朝范纘撰纘字武功婁縣人其詩源出晚唐而參以南宋如蜂憎綠蟻晴偷蜜燕覓青蟲晝哺雛一潭水聚三更月四野山圍小閣燈三秋樹老蟬聲盡八月江寒雁影遲蟬聲送過秋多少鶴夢憑他夜短長之類皆綽有思致而格調未高陳元龍序稱其長堪輿學蓋嘗館於元龍家相傳格致鏡原卽其所纂亦博洽之士也

釀川集十三卷

浙江巡撫採進本

國朝許尚質撰尚質字又文山陰人是集賦一卷雜

文二卷詩五卷詞五卷宋祖煜序謂尚質少而業詩亦喜飲指邑中所謂沈釀川者自號因以名集其文頗有法度詞亦修整惟歌詩稍嫌放縱或不入律云

南園詩鈔十卷

江蘇巡撫採進本

國朝尤世求撰世求字念修長洲人官南充縣知縣是集分金臺草一卷冰壺草二卷湛華草一卷懷新草二卷沁雪草二卷逢辰草一卷都歷草一卷世求爲侗之孫故詩格亦與西堂雜俎相近

舟車初集二十卷

浙江巡撫採進本

欽定四庫全書續編卷一百二十四

集部 別集類存目十一

國朝陶季樞季原名澂字季深後以一字爲字又以字行寶應人王士禎漁洋詩話記其與萊陽董樵同以一字爲字因而賦詩定交者是也其平生足跡半天下詩多於舟車得之因名舟車集其詩多才鋒踔厲風發泉湧不爲邊幅所窘然有警句亦有率句有健句亦有弱句蓋跌宕有餘而陶鍊未至者也

燕堂詩鈔八卷

戶部尚書王際華家藏本

國朝朱徑撰徑字恭亭寶應人喬萊之壻也是集爲

徑所自編自康熙丙寅至己卯凡十四年之詩緣情綺靡頗有格韻特少作居多尙未能盡謝鉛華耳

鈍齋文鈔七卷

江西巡撫採進本

國朝楊兆嶮撰兆嶮字又平瑞金人是集前有自序謂著文三百餘首汰其三之二授諸梓則兆嶮所自定也又有張尙瑗序稱其文似歸有光使汰其冗句俗字固亦近之矣

集古梅花詩

無卷數浙江巡撫採進本

國朝張吳曼撰吳曼字也倩上海人居吳淞江上其地多梅因為集句賦咏凡和中峯禪師韻者一百首和陳涉江韻者三十首自和者十首又一百首則吳曼以同里高士沈球本有是體為繼作而合刻之者又一百首則吳曼六十生日其仲兄文卿取十月先開嶺上梅句集古為壽吳曼因續為之者末附集唐梅歌一首乃七十六歲所作殆終身詠此一花也

根味齋詩集二十卷 編修徐天柱家藏本

國朝徐志莘撰志莘字任可一字商農德清人工部尚書元正子以父蔭官順天府通判是編凡趨庭集二卷壯圖集三卷小草集三卷棄擔集七卷起乾集二卷老傅集三卷詩多取法蘇陸不事雕飾蓋其家學然也

笏峙樓集五卷 江蘇周厚培家藏本

國朝張祖年撰祖年有道驛集已著錄是書釋疑孟一卷以司馬光有疑孟一書而祖年逐條為之辨廢言四卷則其所自著也中多游戲之詞與道驛

集之正色講學者又殊

觀樹堂詩集十四卷

浙江巡撫採進本

國朝朱樟撰樟字鹿田錢塘人由舉人官至澤州府知府其詩為叱馭集一卷人蜀時作也問絹集一卷白舫集二卷古廳集四卷皆令江油時作也冬秀亭集四卷官澤州時作也剡曲集一卷則天台紀遊詩也一半勾畱集一卷則憂歸居杭詩也

恕谷後集十卷續刻三卷

直隸總督採進本

國朝李瑛撰瑛有周易傳註已著錄是集所作古文

也前有其門人閻鎬序稱恕谷者自名其里也後集者自康熙癸未以前俱置之而惟存其後焉者也集首第一篇為送黃宗夏序後有題曰此王崑繩改本也恕谷初學入大家崑繩言當宗秦漢章法訂此恕谷後謂唐宋不如秦漢秦漢不如六經於文法一宗聖經題曰後集云云崑繩者大興王源字也嘗撰文章練要分六宗百家談古文之法後與瑛同師顏元瑛遂從學古文盡棄其少作後集之名蓋別其前之所棄也今觀其文根柢仍出

欽定四庫全書
卷一百一十四
八家但開合斷續不主故常異乎明以來學歐曾者惟以紆餘曼衍爲長耳遽曰秦漢曰六經溢其量矣塏天分本高其學自成一家以經世致用爲主亦具有根柢然負氣求勝其文或失之麤豪少古人淳穆之氣其持論又自命太高自信太果幾於唐宋元明諸儒無一人能當其意亦未免傷於褊激蓋前明自萬歷以後心學盛行儒禪淆雜其曲謹者又闊於事情浴及

國初猶存商俗故顏元及塏獨力以務實相爭存其說以補諸儒之枵腹高談未爲無益然不可獨以立訓盡廢諸家譬諸礫石大黃當其對證實有解結滌滯之功若專服久服則又生他疾耳

東山草堂文集二十卷詩集八卷續集一卷

戶部尚書王際華家

藏本

國朝邱嘉穗撰嘉穗有考定石經大學經傳解已著錄其文頗條暢詩則淺弱集後舊附陶詩箋註五卷邇言六卷又考定石經大學經傳解一卷今各分著於錄俾從其類

在陸草堂集六卷

兩淮馬裕家藏本

國朝儲欣撰欣有春秋指掌已著錄欣以制藝名於時而古文亦謹潔明暢有唐宋家法大致於蘇軾為近所作蜀山東坡書院記宗旨可概見也其中如周公太公論撻伯禽辨袂天子辨皆少迂與齡辨則先儒久言之亦不免為屋下之屋其正統辨不取帝蜀之說亦不免失之好辨也

息廬詩一卷

江蘇周厚堦家藏本

國朝陶爾穉撰爾穉字穎儒華亭人是集前有曹溶

序稱其人巧極天工錯顏光敏序稱其七古似青蓮長吉近體不專一家而各盡其妙今觀所作大抵以才思擅長品格故未能超詣雪美人七律二首世所豔稱實則小巧也

陳恪勤集三十九卷

浙江巡撫採進本

國朝陳鵬年撰鵬年字北溟號滄洲湘潭人康熙辛未進士官至兵部侍郎河道總督謚恪勤是集凡分十編曰耦耕集者以舍北耦耕堂而名也水東集者以其先人隴墓所在也蒿廬集者憂居前後

所作也浮石集胸山集淮海集者皆宦游地也于
山集香山集武夷集者皆往來游息處也未附喝
月詞五卷則詩餘也

道榮堂文集六卷

兩江總督
採進本

國朝陳鵬年撰此本為鵬年所自編刻於恪勤集之
前其生平以清操受

主知詩文非所注意集中亦皆應酬之作更不見所長

固哉叟詩鈔八卷

浙江巡撫
採進本

國朝高孝本撰孝本字大立號青華嘉興人康熙辛

未進士官績溪縣知縣孝本雖年屆四十始為詩
然罷官後放浪山水以老故其詩灑落有清氣但
深厚不足耳是編分十七集曰趨庭集曰江漢集
曰徑山集曰琴溪集曰嶺南集曰秦遊集曰大鄣
集曰葛園集曰晉遊集曰津門集曰南州集曰幔
亭集曰海岱集曰黃梅集曰台雁集皆孝本七十
八歲所自編為雍正丙午以前詩至丁未又編其
病中所作為維摩集附十七集後故自序但列十
七集云

葛莊詩鈔十三卷

內府藏本

國朝劉廷璣撰廷璣有在園雜志已著錄其詩以陸游爲宗在園雜志嘗自記其童去自埋生後火飯來還掩讀殘書一聯或以爲勦襲陸游呼童不至自生火待飯未來還讀書句自辨其用意不同是固誠然然奪胎換骨要不能謂不出於游也又自記有人評其詩曰此亦出入於香山劔南之間而未純者自以爲允可謂自知矣

葛莊編年詩

無卷數 江西巡撫採進本

國朝劉廷璣撰葛莊詩鈔止於官九江道時是編又其官淮徐道時所作分年排次起康熙丁巳止於壬辰後復有補遺一卷

咸齋文鈔七卷

浙江巡撫採進本

國朝查旭撰旭字咸齋海甯人康熙癸酉副榜貢生是集凡書一卷序二卷祭文一卷論一卷傳一卷雜著一卷旭有孝行嘗於兵亂中崎嶇萬里尋父遺柩士論稱之其文源出南宋頗清雅有法度使假之年尙可追古作者前有益都趙執信序作於

旭在之日又有楊中訥序則旭沒後所作也

冰齋文集四卷

浙江巡撫採進本

國朝懷應聘撰應聘字莘皋秀水人是編刊於康熙癸酉蓋所自編皆散體古文而時文選本之序最多

清端集八卷

江西巡撫採進本

國朝陳瓚撰瓚字文煥一字眉川海康人康熙甲戌進士官至福建巡撫諡清端是集凡文七卷詩一卷皆非當行然瓚居官以廉介稱其節概足以自

傳亦不必以文章傳也

夢月巖詩集二十卷

浙江巡撫採進本

國朝呂履恒撰履恒字元素號坦菴河南新安人康熙甲戌進士官至戶部侍郎此集乃雍正乙巳其姪纘會等校刊詩以體分末附詩餘二十四首前有凡例稱其詩或經歲一改或一月數改如洛陽秋思河上寓目詩之頷聯嫌其調近七子輒加竄易金陵雜感之結句嫌其涉於怒罵亦復易之又稱

盛朝詩選載其秦中懷古詩洛陽秋思詩懷公毅詩
字句皆有所竄亂今悉從原本云云或刊版時有
所點定歟

冶古堂文集五卷

浙江巡撫
採進本

國朝呂履恒撰是集為履恒歿後溇安方黎如及其
門人石屏張漢所選定凡一百九十二篇每篇各
有評語如制義之式

雪鴻堂文集四卷

山東巡撫
採進本

國朝李鍾璧撰鍾璧號鹿嵐通江人檢討蕃之子也

康熙丙子舉人官平南縣知縣考古來集部之名
往往相複然無一家之中共一集名者惟呂本中

呂祖謙俱稱東萊集然祖謙集加太史字以別之

見文獻
通考又洪巖虎及其子希文皆名軒渠集然希

文集加續字以別之非竟相同鍾璧之父蕃有雪
鴻堂集已著錄而鍾璧此集仍以雪鴻堂為名父子
竟無所別亦未有之牒例也其詩皆信筆揮灑於
聲律多未能諧疊韻詩九十一首尤多累句自序
謂隨手塗抹長短得失在所不計諒矣其文亦惟

錢定四庫全書總目卷一百一十四
意所如如與陳敷相書引原憲貧也非病之語至
以聖賢爲戲更軼乎規矩之外矣

克念堂文鈔二卷

江蘇巡撫
採進本

國朝雷鐸撰鐸字伯覺蒲城人康熙丙子舉人陝西
通志稱其事繼母孝負米他郡以養遇水幾溺嘗
終日不食不致母缺於供家雖貧養從兄弟及寡
姊妹不少懈朔望聚族人習禮講法以相勸勉蓋
亦篤行之士其文章則以人存之耳

殘本賦清草堂詩鈔六卷

江蘇巡撫
採進本

國朝張棠撰棠字吟樵華亭人康熙丙子舉人官至
桂林府知府告歸後加銜爲太僕寺少卿是編原
分五集曰白雲吟曰一肩吟曰獨宐吟曰江上吟
最後所作曰雪蓬吟今存者惟江上吟及雪蓬吟
餘俱散佚其詩欲以風調勝而骨幹未適

山舟堂集十二卷

江蘇巡撫
採進本

國朝周士彬撰士彬字介文婁縣人康熙丙子副榜
貢生世居千山其山舟堂額猶趙孟頫手書也此
集凡古今體詩一千餘首乃其子忠炳等所刊其

論詩以真朴為主尤喜讀宋儒語錄故所作如存
心養性須常靜莫負吾家太極翁之類皆白沙定
山派也

湛園未定稟六卷 浙江巡撫採進本

國朝姜宸英撰宸英有江防總論已著錄此本為其
未入書局以前所自定不及大興黃氏本之完備
以別行已久姑附存其目

真意堂文彙一卷 浙江巡撫採進本

國朝姜宸英撰此本前有秦松齡序言宸英奉纂修

之

命治裝北上哀為此集蓋其中年所作初出問世之本也

菀青集 無卷數 浙江巡撫採進本

國朝陳至言撰至言字山堂一字青厓蕭山人康熙
丁丑進士官翰林院編修早年與同郡張遠齊名
毛奇齡稱其能守古人三義八法之意而不變今
觀所作以藻縟為主音繁節壯頗似西河集中語
宜奇齡之喜其類已也

華鄂堂集二卷 江蘇周厚培家藏本

國朝周彝撰彝字策銘婁縣人康熙丁丑進士官翰
林院編修其詩喜作長篇如送張長史君山玩雪
遊江心寺諸作皆灑灑千言才鋒橫溢然律以和
平之義往往有乖後附研山十咏別為一卷蓋刊
成之後又續八者也

樸學齋詩集十卷

福建巡撫
採進本

國朝林佶撰佶有甘泉宮瓦記已著錄佶工於楷法
文師汪琬詩師陳廷敬王士禎琬之堯峯文鈔廷
敬之午亭文編士禎之精華錄皆其手書付雕廷

敬士禎之集皆刻於名位烜耀之時而琬集則繕
寫於身後故世以是稱之茲集古體詩三卷今體
詩七卷淵源有自故體格猶為近古特才分差弱
出手微易耳

柳塘詩集十二卷

浙江巡撫
採進本

國朝吳祖修撰祖修字慎思吳江人是集乃康熙己
卯其子大庚所編後有大庚跋稱祖修在時曾版
行五七言古詩已而悔之謂詩當以編年為次不
當分體今所編詩十二卷其半猶出祖修手定也

祖修詩頗雅馴嘗作讀王子淵傳詩有非無聖主
賢臣頌只教宮人記洞簫之句後見升菴集中有
之喜其闇合因作詩誌之然此二語太涉論宗本
非上乘且慎詩亦卽李商隱賈生詩可憐夜半虛
前席不問蒼生問鬼神之意亦非新義也

畏壘山人詩集四卷

浙江巡撫
採進本

國朝徐昂發撰昂發有畏壘筆記已著錄是集諸體
雜編其五言古體大抵刻峭清新一往駿利有透
空碎遠之音而下手太快亦頗乏淳蓄深厚則思

銳而才狹之故也

澄懷園全集三十七卷

通政司使張
若淳家刊本

國朝張廷玉撰廷玉字衡臣號硯齋桐城人康熙庚
辰進士官至保和殿大學士謚文和是集爲廷玉
所自編凡文存十五卷皆乾隆戊辰以前作詩選
十二卷皆雍正乙卯以前作載賡集六卷皆乾隆
丙辰以後作澄懷園語四卷則所作筆記也

秋江詩集六卷

福建巡撫
採進本

國朝黃任撰任字莘田永福人康熙壬午舉人官至

四會縣知縣杭世駿榕城詩話稱其工書法好賓客談諧談笑一座盡傾罷官歸里壓裝惟端溪石數枚詩東兩牛腰而已其詩源出溫李往往刻露清新別深懷抱如楊花絕句云到底不知離別苦後身還去作浮萍春日雜思云夕陽大是無情物又送墻東一日春所爲緣情綺靡殆於近之而低徊宛轉亦或闌入小詞大致古體不如今體大篇又不如小詩故榕城詩話獨稱其七絕蓋才分各有所長云

秋葉軒詩四卷

江蘇巡撫採進本

國朝張琳撰琳字佩嘉一字玉田錢塘人是集乃康熙丙戌其友趙炎所選定集中近體多於古體而七言律詩一種又多於諸體大抵圓熟流利篇篇如一蓋其瓣香惟在劔南一集耳

黑蝶齋詩鈔四卷

浙江巡撫採進本

國朝沈岸登撰岸登字覃九號惰耕邨叟平湖人是集乃康熙壬午岸登歿後其從子黼熊所編共詩四百四十餘首其詩瘦削無俗韻而邊幅微狹亦

欽定四庫全書總目卷一百八十四

集部 別集類存目十一

十七

緣於是

樓邨集二十五卷

安徽巡撫採進本

國朝王式丹撰式丹字方若寶應人康熙癸未進士
第一官翰林院修撰是集乃雍正甲辰其子懋訥
所刻分年編次凡龍竿集五卷翠蘇集七卷補過
齋集二卷忍冬齋集七卷鴻柯集一卷梅花書屋
集三卷起壬申迄丙申每年一卷惟龍竿集之第
五卷為其壬申以前詩不以冠集而以殿集以少
作故也

古劔書屋文鈔十卷

江蘇巡撫採進本

國朝吳廷楨撰廷楨字山掄長洲人康熙癸未進士
官至左春坊左諭德是編凡詩八卷末附補遺及
詩餘又雜文二卷乾隆丙子其孫士端刊於貴州
其名曰古劔書屋者

聖祖仁皇帝南巡廷楨以舉人

召試

御書古劔篇以賜因以為名誌榮遇也

緯蕭草堂詩六卷

浙江巡撫採進本

次定可直

集部

別集類存目十一

六

國朝宋至撰至字山言商邱人吏部尙書學之子康熙癸未進士官翰林院編修初刻有緯蕭堂詩一卷附彙集後此其全集也至承其家學兼得新城王士禎之傳故其詩派亦介出於父師之間但才與學均未及耳集中孔雀聯句父子同爲之蓋用蘇軾與子過聯句例也

績學堂文鈔六卷詩鈔四卷

兩江總督採進本

國朝梅文鼎撰文鼎有歷算全書已著錄其以績學名堂者初大學士李光地嘗薦文鼎於朝康熙乙

酉恭逢

聖祖仁皇帝南巡文鼎迎

鑾道左蒙

召對

御書績學參微四字賜之因以名堂併以名集也然文鼎測驗推算諸法皆足以自傳於後詩文特其餘事非所擅長蓋算術雖一藝而非以畢生之精力專思研究則莫造其微雖超特絕世之姿其勢不能以旁及張衡深通歷算妙契陰陽至能作候風地

動儀而文章博麗又能凌轢崔蔡之間千古一人而已自洛下閱鮮于妄人以下瀄風一行亦未能以詞采著也斯亦物不兩大之理矣

滋蘭堂詩集十卷

浙江巡撫採進本

國朝沈元滄撰元滄有禮記類編已著錄是編分六集曰康瓠集灌畦集今兩集紫貝集勞薪集西征集前有其孫廷芳題識稱康瓠集爲家居侍親及爲查氏贅壻時作灌畦集爲移居龍山時作今兩集爲八直

武英殿時作紫貝集爲官文昌時作勞薪集爲罷官後自京赴粵時作西征集爲由粵赴京謫居銀州時作元滄爲查昇之壻久與查慎行遊故其詩格頗近初白堂集云

澹初詩彙八卷附見山堂詩鈔一卷

編修程晉芳家藏本

國朝沈翼機撰翼機字西園號澹初海甯人康熙丙戌進士官至翰林院侍讀學士詩分十集曰謀野集曰新安集附黃山紀遊百詠皆翼機爲諸生時作曰瀛洲集丹葵集皆館選後作曰蜀使草康熙

甲午典試四川時作日黔使草康熙丁酉至庚子
為貴州學政時作日江右使草雍正癸卯至丙午
為江右學政時作日兩山集乞假歸田後作日觀
光集乾隆元年翼機復補原官後作日游衍集則
致仕後作也附見山堂詩鈔一卷為其子廷薦之
作廷薦字澄懷雍正壬子舉人未仕早卒僅存詩
六十餘首

集虛齋學古文十二卷

浙江巡撫
採進本

國朝方黎如撰黎如有離騷經解已著錄其制義最
有時名而散體之文亦頗奧勁有筆力然喜雕琢
新句襲積古辭遂流為別派蓋其制義亦喜以新
穎為工天性然也

覲齋詩選二卷

山東巡撫
採進本

國朝張謙宜撰謙宜號稚松膠州人康熙丙戌進士
是集未有法輝祖跋謂全橐三千餘首暮年自訂
存詩四百餘篇自序凡千言極述其苦吟之狀然
其詩出入於香山劔南之間一吟一咏亦足自娛
起而抗衡古人則力尙不逮也

金定四庫全書
藝村集四卷

編修周永年家藏本

國朝王萃撰萃字秋史歷城人康熙丙戌進士其詩為王士禎田雯所稱而文不甚顯乾隆癸巳桂林胡德琳得其本於歷城周氏為刪訂付梓德琳為之序稱原本分甲乙二集自癸亥至庚子三十四年之作各自編年惟辛丑以後之文無存今仍其舊編為四卷乙居四之一惟書記記傳註干支於本目之下使後人有所考焉

雪鴻堂文集二卷

山東巡撫採進本

國朝李鍾峩撰鍾峩號芝麓通江人康熙丙戌進士官翰林院檢討是集乃其督學福建時所編凡賦頌一卷詩一卷多館課及應酬之作案鍾峩父蕃有雪鴻堂集其兄鍾璧集襲用其名鍾峩又襲用其名殊不可解如以為家乘之總名則又各為卷第例亦難通也

王石和文集

無卷數山西巡撫採進本

國朝王珩撰珩字石和又字韞輝孟縣人康熙丙戌進士官翰林院檢討是集中多議論之文筆意亦

頗縱橫其記周遇吉死節事謂賊兵攻城急城將陷賊募獻遇吉者遇吉謂左右曰豈惜一死以累衆可獻我兵民環泣衆遂以繩繫公下有兩賊掖之去公見賊罵倒懸演武廳磔之云云與明史本傳不合又以蚘蚘廟爲田子方廟與朱彝尊碑不合其最異者如文昌閣碑記謂孔子不得帝君之教天下將有悖心反道肆然於日用倫常之際而不復以天地日月爲可忌者尤不可爲訓也

十峯集五卷

江蘇周厚堦家藏本

國朝徐基撰基字宗頊華亭人由貢生官訓導是集自詩賦文及填詞皆集前後赤壁賦中字錯綜盡變極有巧思若其中遊小赤壁賦春日遊小赤壁賦及道德篇諸作皆洋洋數千言而伸之縮之不出四百餘字之外雖才人狡獪不足以語大雅而專門之技別開奧窔亦詞苑中之奇作互古所未有者也末卷做梁簡文蘇蕙蘭古盤鑑圖及宋庠寄范仲淹諸迴文皆有思致卷首有康熙丙戌陳元龍序序集聖教序中字亦如自己出以弁此集

可云勁敵然元龍特偶一爲之尙無不可基則敵
一生之精神成此一集可謂宋人之楮葉矣

蓬莊詩集六卷

江西巡撫
採進本

國朝沈虹撰虹字渭梁長洲人是集其所自編以作
詩先後爲次起康熙丁亥訖雍正甲辰古今體共
五百四首每卷之前皆有小引紀其歲月及所閱
歷遭逢

雄雉齋選集六卷

江蘇周厚
堉家藏本

國朝顧圖河撰圖河字書宣江都人康熙己丑進士

官翰林院編修圖河爲江左十五子之一其詩古
體多學眉山近體多學劔南詠物諸作亦頗新穎
而在同時諸人之中尙未能籠罩一切也

青溪詩偶存十卷

江蘇巡撫
採進本

國朝蔣錫震撰錫震字豈潛宜興人康熙己丑進士
是集分二十二種曰輟耕草北征集渡河集贅肱
集北游草楚游草還山草汗漫吟北行草歸耕草章
江草還山草後北游草涉江草洛遊草灌園草游
燕草廬中吟後章江草還山吟金臺草學製集自

己巳至壬寅凡三十四年之作皆以年編次

退谷文集十五卷詩集七卷

兩江總督採進本

國朝黃越撰越字際飛上元人康熙己丑進士改庶吉士所著四書大全合訂及選刻制義如明文商今文商墨卷商考卷商之類皆盛行一時蓋平生精力注於講章時文此集所著詩古文乃以餘暇兼治者其尚書古今文辨惟以蔡傳折服諸家三傳得失辨惟以胡傳斷制衆論亦仍舉業繩尺也

圭美堂集二十六卷

浙江巡撫採進本

國朝徐用錫撰用錫字畫堂宿遷人康熙己丑進士官翰林院編修是集詩十卷文十六卷乃其族子鐸及門人周毓崙所校刊用錫從學於李光地作文以樸澹爲長生平書法頗工集中字學劄記二卷皆自道其心得其他題跋亦辨論法帖手跡者居多

青要集十二卷

浙江巡撫採進本

國朝呂謙恆撰謙恆字天益河南新安人康熙己丑進士官至光祿寺卿謙恆嘗讀書青要山因以名

集其詩純作宋格疎爽有餘而亦頗傷樸直如洗

象行之類皆病於太質

吾廬遺書

無卷數 江西 巡撫採進本

國朝陶成撰成有皇極數鈔已著錄是集為其子其

懷所編皆所作雜文頗純正有軌度而稍狹於波

瀾其中象緯考一篇有錄無書意傳寫佚之或訂

定時刪去而誤畱其目也

性影集八卷

江蘇巡撫 採進本

國朝王時憲撰時憲字若干號禊亭太倉人康熙己

丑進士由宜興教諭改翰林院庶吉士是編凡八

集集各一卷曰水邊林下稟曰桐溪稟曰無隱林

稟曰靜寄軒稟曰莊澗稟曰荆溪稟曰楚遊稟曰

粵遊稟其名性影者蓋取邵子情為性影之說也

集中近體頗饒風致擬古諸作則隨意抒寫不甚

求工

改堂文鈔二卷

江蘇巡撫 採進本

國朝唐紹祖撰紹祖字次衣江都人康熙己丑進士

由庶吉士改刑部主事官至湖州府知府仍入為

刑部員外郎告歸卒紹祖少師姜宸英登第出安溪李光地之門故其文蒼勁有師法此集乃晚年手自刪定僅存四十三篇皆其生平得意之作也

石川詩鈔三卷

浙江巡撫採進本

國朝方觀撰觀字近雯江都人康熙己丑進士官至陝西布政使是集乃其小子柱山所編凡各體詩二百六十餘首其題朱彝尊手書詩冊有曝書亭下自鈔詩想見蒼茫獨立時不是到門親受業唐音宋格有誰知蓋嘗從學於彝尊者也

師經堂集十八卷

浙江巡撫採進本

國朝徐文駒撰文駒字子文鄞縣人康熙己丑進士是集為文駒所自編凡文十三卷詩五卷前有孫勳序稱其濬伊洛之淵源採韓歐之骨髓沈浸醲郁積有年歲自序亦主於自達其情今觀其集滔滔而出足以暢所欲言然未能固而存之也

墨瀾亭集

無卷數江西巡撫採進本

國朝帥我撰我字備皆號簡齋奉新人康熙辛卯舉人江西古文自艾南英倡於前魏禧等和於後踵

而起者雖所造深淺不同而大都循循有舊法是集亦其一也舊刊版於南昌所載未備雍正乙卯其子念祖屬徐廷槐彙取已刻未刻諸稟哀爲此本凡一百四十篇

殘本雲川閣詩集九卷

兩江總督採進本

國朝杜詔撰詔字紫綸無錫人康熙乙酉

聖祖仁皇帝南巡迎

鑾獻詩

命供職

丙廷壬辰會試榜後

特賜一體殿試改庶吉士是編總題雲川閣集而僅有古體詩詩又起於卷三終於第十二前無目錄其版又近時新刻不喻其故或裝緝者佚之耳

間邱詩集六十卷

兩淮馬裕家藏本

國朝顧嗣立撰嗣立有溫飛卿詩註已著錄江南通志文苑傳稱嗣立博學有才名尤工詩所居秀野草堂嘗集四方知名士觴詠無虛日風流文雅照映一時曾撰元詩選四集採摭略備蓋其性之所

近故詩亦往往似之

今有堂詩集六卷附茗柯詞一卷編修程晉芳家藏本

國朝程夢星撰夢星字午橋號香溪江都人康熙壬

辰進士官翰林院編修家有篠園擅水竹之勝日

與賓客吟詠其中年七十七乃卒是編分六集曰

漪南集蝨餘集五賦集山心集琴語集就簡集未

附茗柯詞其詩略近劔南一派而閒出入於玉溪

生詞亦具南宋之體但格力差減耳

二水樓詩集十八卷文集十卷江西巡撫採進本

國朝李茹旻撰茹旻字覆如臨川人康熙癸巳進士

官中書舍人嘗預修廣西通志撫州府志所作凡

例及諸傳序皆載集中

朱圉山人集十二卷陝西巡撫採進本

國朝聳建豐撰建豐字子文號渭川又號介亭伏羌

人康熙癸巳進士官至翰林院侍讀學士是集詩

文各六卷又以補遺之文附於詩末大抵平實簡

易無擅勝之處亦無踳駁之處

三華集四卷兵部侍郎紀昀家藏本

國朝梁機撰機字仙來泰和人康熙癸巳進士是集
機所自編分四子部一曰八洛志勝多題詠古蹟
之作一曰燕雲詩鈔隨侍其父宦游京邸之作皆
王士禎選定一曰徵草則乾隆元年薦舉博學鴻

詞

召試入都之作一曰還草則試不入格歸途之作也

練溪集五卷

山東巡撫
採進本

國朝傅米石撰米石字立元鉅野人康熙癸巳舉人
是集凡文二卷詩二卷雜記一卷前有其門人李

包序後有其子爾德所作家傳其古文頗謹嚴有
法度如琢磨偶記序誤以碧雲馱爲白獺髓引據
或疎管蔡論謂周公勝季友殊爲贅衍季札論責
以當爲伯夷泰伯之逃亦爲吹索然其他率不失
醇正雜說持論亦平允其曰讀書之人屏伏田里
不敢爲畸邪之行不敢爲詭激之論不敢著非聖
之書謹身力行以爲齊民先是卽所以報君父可
謂有德之言其誤以鉤輅爲蟬之類特小失耳惟
古詩以文筆爲之猶未乖大雅近體則皆不入格

甚至以海若押八馬韻是蘭若之若也以刻鏤讀
爲平聲是屬鏤之鏤也吟詠非所擅長而雜然編
錄轉爲全集之累是則其後人之過矣

約園詩鈔二卷

福建巡撫
採進本

國朝郭雍撰雍字仲穆一字書禪福清人約園其號
也康熙癸巳舉人是集各體詩共二百餘首雍自
謂前後所作多屬近體於古體歌行閒存一二樂
府則有待而未及今觀其詩惟五言律詩頗有局
度餘皆平平詩不洽溯於古而先求之偶儷之格

終不能探其本也

瓦缶集十二卷

浙江巡撫
採進本

國朝李宗渭撰宗渭字秦川嘉興人康熙癸巳舉人
初於康熙丁亥自編其詩爲瓦缶集三卷後又有
永懷集一卷附刻以行宗渭沒後其婿高衡乃哀
其遺詩編爲樂府一卷古體九卷近體二卷仍以
瓦缶爲名從其初稱也其詩古體多於近體五言
多於七言大旨以漢魏六朝唐人爲法而不自爲
宋元之格故字句率有古意昔人論林鴻之詩如

唐摹晉帖者其庶幾乎

若菴集五卷

兩江總督採進本

國朝程庭撰庭字且碩號若菴歙縣人是集文一卷

次詩一卷次詩餘一卷次停驂隨筆一卷康熙癸

巳庭至京祝

釐隨日紀行所作附以詩詞次春帆紀程一卷則自揚州

至歙往返所作亦有詩詞附焉

嗜退山房彙五卷

江西巡撫採進本

國朝帥仍祖撰仍祖字宗道號介亭山人奉新人是

集乃仍祖自編其康熙癸巳甲午二年所作凡詩

二卷文三卷

空明子詩集十卷又八卷文集六卷又二卷雜錄一卷

詩餘一卷

江蘇巡撫採進本

國朝張榮撰榮字景桓華亭人自序謂生平共得古

文雜作六百餘首詩三萬餘首詩餘一千五百餘

首歌謠三百餘首康熙甲午檢出盡付祖龍僅存

三十分之一卽是編也詞意多放曠不羈

挹青軒詩彙一卷

江蘇巡撫採進本

國朝華浣芳撰浣芳蘇州女子華亭張榮之妾也年二十三而卒榮刊其遺詩自爲作序述其九歲時夢見唐太宗召有唐一代諸詩人教之作詩其事甚怪榮好爲遊戲之文殆亦寓言耶

龍溪草堂集十卷

山東巡撫採進本

國朝王世睿撰世睿字道存章邱人康熙乙未進士官上海縣知縣世睿初改庶吉士及散館仍外補故是集多館課之作至第九卷金陵宦橐中八勸八戒詩意求通俗然太質勝於文矣

陳玉几詩集三卷

禮部主事任大椿家藏本

國朝陳撰撰字楞山號玉几鄞縣人以書畫遊江淮閒窮愁寡合故其詩多悽斷怨咽之音是編刻於康熙丙申蓋其中年所作首日繡鈇集一卷次曰玉几山房吟一卷次曰玉几山房擬古詩一卷皆戛戛獨造如其爲人雖未及古要能離俗惟擬古詩中多載勝流評語仍沿明末山人之習耳

雲溪文集五卷

兩江總督採進本

國朝儲掌文撰掌文字曰虞一字越漁宜興人康熙

欽定四庫全書總目卷一百八十四

集部

別集類存目十一

三

丁酉舉人官四川納溪縣知縣納溪舊名雲溪故掌文以雲溪自號是集又名雲溪隨筆自備欣以古文詞有名其家父子兄弟多以此相鏃厲掌文為欣之孫得其指授為多今世所傳欣選左國史漢及唐宋十家文即其甄錄以授掌文者也

據梧詩集十五卷

兩淮馬裕家藏本

國朝管榦撰榦有師宗州志已著錄是編凡吹萬集之卷柏軒草二卷修琴閣集二卷鷗馴集二卷天外集二卷圃華集二卷寓槩彙三卷邵長蘅序稱

其詩先學劔南後學少陵今觀所作大抵先入者為主也

近道齋文集六卷詩集四卷

吏部主事張慎和家藏本

國朝陳萬策撰萬策字對初一字謙季安溪人徒於晉江康熙戊戌進士官至詹事府詹事緣事降翰林院檢討終於侍讀學士萬策以康熙癸酉舉於鄉困公車者二十六年久從李光地游多得其指授然平生詩文多散佚不收此本乃乾隆癸亥其子冕世所輯其中西洋算法異同論頗能究其所

以然李光地施琅諸傳軼聞舊事亦多可考云

白田草堂存彙二十四卷

兩江總督
採進本

國朝王懋竑撰懋竑有白田雜著已著錄是集凡文
二十卷詩四卷未附行狀一篇其學長於考證故
全集以雜著為冠詩文則未能過人其與方苞書
自謂筆力拖沓不近古人所謂人之知我不如我
之自知亦足見其學問之篤實也

莊元仲集一卷

福建巡撫
採進本

國朝莊亨陽撰亨陽有算學已著錄此集僅文十二

篇乃其官淮徐道時所上河防條議也

綠蘿山房文集二十四卷詩集三十三卷

江蘇巡撫
採進本

國朝胡浚撰浚字希張號竹巖會稽人康熙庚子舉
人是編文皆駢體浚自為之註前有魯會煜序稱
仿韓非子有經有傳例然韓非子經傳各自為條
其著書句下自註者始班固漢書藝文志作文句
下自註者始謝靈運山居賦浚蓋用靈運例也

寒香閣詩集四卷

山東巡撫
採進本

國朝鄧鍾岳撰鍾岳有知非錄已著錄是集為乾隆

次定四庫全書總目卷一百八十四

集部
別集類存目十一

三五

乙亥其子汝功汝敏所編凡古今體詩一百九十
二首其詩頗溫厚和平無血脈僨張之狀而材地
稍弱尙未能頡頏古人

墨麟詩十二卷

浙江巡撫
採進本

國朝馬維翰撰維翰字墨麟海鹽人康熙辛丑進士
官至四川川東道其詩以縱橫排奐爲長意之所
向不避險阻然神鋒太儻者居多

秋塍文鈔十二卷三州詩鈔四卷

浙江巡撫
採進本

國朝魯曾煜撰曾煜字啟人秋塍其別號也會稽人

康熙辛丑進士改庶吉士未授職乞養親歸教授
生徒終於家是集文一百二十一篇中多考證之
作其文氣頗剽急蓋才性使然若續中山狼傳之
類雖規撫毛穎然不作可也目列易本末論六十
四篇易纂例八十篇而有錄無書蓋均未刻又廣
東祥符二志凡例亦有錄無書殆以已見於兩志
歟其詩以三州名集自序曰杭州汴州廣州也蓋
其歷主講席游蹤所及之地云

最古園二編十八卷

江蘇周厚
堉家藏本

欽定四庫全書總目卷一百八十四 集部 別集類存目十一

國朝羅人琮撰人琮字紫蘿湖南桃源人康熙辛丑
進士官至監察御史是集人琮所自定其云二編
以尙有初刻最古園集二十四卷也然其初刻今
未之見此集詩文則大抵以才氣用事曼衍縱橫
者也

陸堂文集二十卷詩集十六卷續詩集八卷

浙江巡撫
採進本

國朝陸奎勳撰奎勳有陸堂易學已著錄是集前有
自序謂在長洲汪琬秀水朱彝尊之間其文內序
問考辨諸篇亦頗博辨然說經好爲異論頗近毛

奇齡尙不及琬與彝尊也

唐堂集六十一卷

江蘇巡撫
採進本

國朝黃之雋撰之雋有香屑集已著錄是集凡五十
卷又補遺二卷續集八卷皆之雋所手編各有自
序末附冬錄一卷則所自撰年譜也之雋之學排
陸王而尊程朱多散見所作詩文中持論甚正而
綜覽浩博才華富贍興之所至下筆不能自休往
往溢爲狡獪游戲之文不免詞人之結習又名譽
旣盛贈荅遂繁牽率應酬不能割愛榛櫟勿翦所

存者不盡精華譬之古人殆陸機之患才多矣

雲在詩鈔九卷

浙江巡撫探進本

國朝查祥撰祥字星南海甯人康熙辛丑進士官翰

林院編修祥早歲嘗舉博學鴻詞晚乃登第年至

八十餘而歿詩集未經刊行此流傳寫本也

小蘭陔集十二卷

福建巡撫探進本

國朝謝道承撰道承字又紹號古梅閩縣人康熙辛

丑進士官至內閣學士兼禮部侍郎是集詩十卷

文二卷道承假歸養親故取南陔補亡詩語名集

而集中所載則應制館課之作皆在焉不專家居

作也其中碑帖題跋亦頗具鑒賞

桐村詩九卷

江西巡撫探進本

國朝馮詠撰詠字夔颺金谿人康熙辛丑進士官翰

林院編修是編一卷為一集一曰江漢集二曰日

下集三曰章江集四曰南海集五曰南海二集六

曰公車集七曰玉堂集八曰京口集九曰黔中集

分年編次各以作詩之地為名始於康熙癸巳迄

於雍正己酉共十七年之詩前有自序題康熙甲

午蓋江漢集之序刊版時取冠全詩爾

崇德堂集八卷

直隸總督探進本

國朝王植撰植有四書參註已著錄此集植所自編其學主於敦勵名節而事事有濟於物故集中所載多居官案牘之文頗足見其生平其考論經籍則好以意推理斷不能一一徵於古也

偶存草

無卷數直隸總督探進本

國朝王植撰是集亦植所自編植喜講學故其詩全沿擊壤集之派

牆東雜著一卷

浙江巡撫探進本

國朝王汝驥撰汝驥字雲衢所刻制義或自書曰云劬又自書曰耘渠皆以同音假借也金壇人由貢生官通江縣知縣此編乃所作古文其以牆東為名蓋用後漢王君公事汝驥掉鞅文壇事殊牛僧殆以其王姓斷章取義耶文凡二十一篇前六篇皆經說後十五篇則皆史評也其術序記謂學記術有序即遂也辨舊志讀術為州之非考春秋秦伯使術來聘公穀作使遂則汝驥之說實闡合古

義其苟或論上下二篇反覆推獎以為有道之士則過矣

與梅堂遺集十二卷耳書一卷鮮話一卷江蘇巡撫探進本

國朝佟世思撰世思字儼若正藍旗漢軍以蔭生官思恩縣知縣是集凡詩十卷詞一卷雜文一卷其弟世集哀而刻之末附耳書一卷皆記所聞見荒怪之事分人物神異四部鮮話一卷則以公事至恩平而記其風土也

金閭齋集十二卷江蘇巡撫探進本

國朝金做撰做字廓明號閭齋武進人其學出於東林是書首載家訓紀要次默齋湯先生述略次其學山居會約次自知日錄次讀史筆記次古今體詩次雜著次可凡編次客憲偶記次師古約言次宗約宗範其中家訓紀要一卷乃其父所劄記以訓子孫做更纂而錄之故冠首云

前溪集十四卷浙江巡撫探進本

國朝唐靖撰靖字聞宣武康人康熙中諸生是集詩八卷文五卷二集詩一卷其詩頗具風骨閒傷率

易其文亦然五卷論水利樂律諸條則科舉答策之類耳前溪在武康縣治南源出銅峴山在六朝為繁會地所謂前溪舞者是也

華林莊詩集四卷

江蘇巡撫採進本

國朝姚孔鑄撰孔鑄字梁貢號于巢桐城人康熙中諸生其詩七言絕句工於寫景如垂楊枝上鶯捎蝶撼得飛花破水痕之類亦殊有晚唐風味所謂香車金犢陌上畱連者也至黃雲白雪門前路蒼麥田中作菜花之類則刻畫太甚無情景交融之

致矣

瓠尊山人詩集十七卷

檢討蕭芝家藏本

國朝夏熙臣撰熙臣字無易孝感人七歲補諸生以歲貢官安陸府教授初著有巢雲閣詩十五卷後增以新作重編為此集其詩才情富贍故往往疊韻至五六又和阮籍詠懷擬李東陽樂府殆遍然連篇累幅瓊瑜不免互見亦所謂武庫之兵利鈍互陳者矣

道腴堂詩集四卷

江西巡撫採進本

欽定四庫全書總目卷一百八十四

集部 別集類存目十一

國朝曹煜會撰煜會號麓蒿上海人康熙末貢生是集爲其孫錫寶所編石倉世纂之第一種也凡詩一百五十五首煜會爲雲閒董俞弟子故其詩聲律格調頗有師法然卷中但存近體而無古詩王延年序稱其懶不自惜散佚頗多今所傳者皆其孫口授豈訓課時惟取聲律諧適易於記誦故耶

長嘯軒詩集六卷

江西巡撫採進本

國朝曹煥會撰煥會字祖望號春浦上海人康熙末貢生炳會之弟也是集爲石倉世纂之第二種凡

詩四卷後附詩餘一卷雜著一卷其生平所注意者在於詩餘駢體其詩亦專學晚唐以纖麗自喜

放言居詩集六卷

江西巡撫採進本

國朝曹炳會撰炳會字爲章號巢南上海人康熙末諸生煜會之從弟也是集爲石倉世纂之第三種凡詩五卷後附雜著一卷并從子一士所撰墓誌銘其詩與煜會道腴堂集格律相近而才地稍遜焉

隨村遺集六卷

江西巡撫採進本

次定四庫全書總目卷一百八十四

集部 別集類存目十一

四三

國朝施璫撰璫字隨村宣城人侍讀閩章之孫也此集為杭世駿所編其詩酷學其祖而風格稍峭邊幅稍狹則根柢之深厚不及也

有懷堂詩文集一卷

江西巡撫採進本

國朝田肇麗撰肇麗字念始號蒼厓戶部侍郎雯之子官戶部郎中肇麗負雋才而屢試不第其入官也以任子故述懷詩有慚非科名人句蓋吟咏之閒嘗以是耿耿云

靜便齋集十卷

浙江巡撫採進本

國朝王曾祥撰曾祥字磨徵仁和人康熙末諸生與厲鶚金農諸人相唱和是集前五卷為詩後五卷皆雜文靜便齋者館於義橋陳氏時所葺取謝靈運還得靜者便句名之有所為記見於集中前有雷鉉所撰兩王生小傳一謂曾祥一謂江都王世球也

鍾水堂詩三卷

山東巡撫採進本

國朝顏肇維撰肇維字次雷曲阜人官臨海縣知縣是集乃其官浙東時所作多學南宋諸家

帶月草堂詩集一卷

山東巡撫採進本

國朝顏懷禮撰懷禮字約亭曲阜人襲世職為五經博士好學喜為詩早年天逝故骨格未成此集為其弟懷繹所編前有康熙後壬寅嶧縣李克敬序亦稱天假以年俾盡其勤何遽不如鏤肝斷髓者之所為也

青嶼彙存

無卷數 浙江巡撫採進本

國朝張安絃撰安絃字琴父烏程人其文以才氣勝而喜事塗澤詩則音節疎放亦未能磨礪圭角

桐乳齋詩集十二卷

浙江巡撫採進本

國朝梁文濂撰文濂字谿父錢塘人大學士詩正父也是集凡詩九百餘首而同時唱和諸作亦閒附錄杭世駿序稱其壯時南浮衡湘北抵碣石踐歷嵩華迴旋宋衛之郊蓋頗耽懷山水者故記游之詩為最多焉

橡村集四卷

山東巡撫採進本

國朝朱繩撰繩字子青號橡村歷城人候補主事嘗學詩於王士禛所作具有法程而早年天逝故骨

次定四庫全書總目卷二百八十四

集部 別集類存目十一

罌

格未成是集分四種曰風香集曰吳船書屋集曰
觀稼樓詩曰雲根清壑集自吳船書屋以下皆士
禎之所評定也

蒼雪山房彙一卷

山東巡撫
採進本

國朝朱綱撰綱字子驄歷城人官至福建巡撫與兄
綰絳皆學詩於王士禎是集亦士禎所評定詩頗
清淺蓋少作也

吾友于齋詩鈔八卷

浙江巡撫
採進本

國朝張錫爵撰錫爵字擔伯號中巖嘉定人寄居吳

江是集前有雍正乙巳張雲章序題曰原序蓋為
其舊彙而作又有乾隆辛酉朱稻孫序則刊此本
時所作其詩酷摹王士禎亦往往得其一體其齋
名吾友于者取杜甫岳麓寺詩山鳥山花吾友于
語也

欽定四庫全書總目卷一百八十四

番禺盛鴻鈞初校
順德馮佐勛覆校

欽定四庫全書總目卷一百八十四

集部 別集類存目十一

四十五

欽定四庫全書總目卷一百八十五

集部三十八

別集類存目十二

蔗尾詩集十五卷文集二卷

福建巡撫
採進本

國朝鄭方坤撰方坤有經稗已著錄方坤天分既高
記誦尤廣故其詩下筆不休有凌厲一切之意尤
力攻嚴羽滄浪詩話詩不關學之非然於澀字險
韻恆數十疊雖閒見層出波瀾不窮要亦不免於
炫博此又以學富失之所謂矯枉者必過直也其

詩凡分十五集曰刪餘草曰公車草曰木石居草
曰公車後草曰木石居後草曰丁年小草曰叢臺
臺曰春明草曰廣川臺曰酒市臺曰一粟齋臺曰
瓶花齋臺曰杞菊軒臺曰詩話軒臺皆古今體詩
曰青衫詞則詩餘附錄者也文集二卷亦大抵儷
體居多蓋其根柢在六朝也

樹人堂詩七卷

江西巡撫
探進本

國朝帥念祖撰念祖字宗德號蘭臯奉新人雍正癸
卯進士官至陝西布政使緣事謫戍軍臺沒於塞

外是集前有何焯序稱念祖塞上所作有多博吟
今未見此七卷則念祖官陝西時所自編也念祖
以時文鳴一時務以幽渺之思擺脫陳因其詩亦
清刻不俗但平生精力盡於八比徒以餘力爲之
未能自成一隊耳

涵有堂詩文集四卷

福建巡撫
探進本

國朝游紹安撰紹安號心水福清人雍正癸卯進士
官至南安府知府是集詩二卷文二卷紹安守南
安幾二十年故詩文多南安所作其文務爲奇崛

欽定四庫全書

集部 別集類存目十二

二

語詩亦欲以生僻見長

南陔堂詩集十二卷

編修徐天柱家藏本

國朝徐以升撰以升字階五號恕齋德清人雍正癸

卯進士官至廣東按察使是編為其孫天柱天驥

所刊分年編次日學步集雪泥集湘灘集秋帆集

夢華集忽至草黃樓草岫岫草南還集黔游草煙

江疊嶂集閒閒集凡十二種

王已山文集十卷別集四卷

江蘇巡撫探進本

國朝王步青撰步青有四書本義匯參已著錄金壇

王氏以八比稱於世者凡六人所謂王氏六子是

也六子之中汝驤及步青名尤著汝驤文神思澹

遠取徑單微步青則法律嚴謹不失尺寸在近時

號為正宗於古文則餘力及之非所專門也其集

原名竹里草堂遺藁乃步青沒後其子士鼈所編

後甯化雷鉉督學江蘇時從士鼈取其藁本重為

刪定凡存九十餘篇勒為十卷用步青別號改題

今名又別集四卷皆其時文選本之序論則士鼈

哀輯編次附刊以行蓋步青困諸生者二十餘年

至康熙甲午乃舉於鄉往來公車又十年至雍正
癸卯始成進士旋以病乞歸里居教授惟以評選
時文爲事平生精力盡在於是故講論時文之語至於
積成卷帙攷論文之書自摯虞文章流別後凡數百
家其專論場屋程式者則自元倪士毅作義要訣
始自爲一編於例當入詩文評類以其原附本集
之未故仍其舊焉

江聲草堂詩集八卷

浙江巡撫
採進本

國朝金志章撰志章字繪自仁和人雍正癸卯舉人

官至口北道是編分七集曰敝帚曰梅東曰始游
曰鏡中曰瞻雲曰谷雲曰漁浦歸耕其詩五言古
體多近蘇軾七言古體多近溫庭筠近體多近陸
游范成大

謙齋詩彙二卷補遺一卷

浙江巡撫
採進本

國朝曹庭樞撰庭樞字六薌嘉善人雍正癸卯副榜
貢生乾隆元年嘗薦舉博學鴻詞集中載有

午門謝頒月廩恭紀詩卽其事也是集亦皆其游京
師時所作

欽定四庫全書總目卷一百八十五

集部 別集類存目十二

四

司業文集四卷 江蘇巡撫探進本

國朝陳祖范撰祖范有經咫已著錄其為文不規規於摹古而學有根柢暢所欲言亦自合古人法度其中如方孝孺死節論讀禮記述史述斂用喪服議陳貞女合葬議王罕皆文彙序汪西京文彙序王次山詩序樂府解皆有可觀而如記昌黎集後務為新論別號舍文忽作俳體松筠堂宴集詩序雜以儷詞又多收一切應俗之作蓋編錄時務盈卷帙一概登載未免失於刊除使簡汰精華十存

三四豈不翹然作者哉

司業詩集四卷 江蘇巡撫探進本

國朝陳祖范撰前有自序題乾隆壬申而第四卷乃題自乙丑至甲戌詩蓋又有所續入如古人後集別集例也其詩直抒胸臆不煩繩削於古人中去白居易為近敖陶孫所謂事事言言皆著實者也自序有曰詩之作出於無心則其情真又必各有所為則其義實故一國之事繫一人之本而匹夫匹婦之歌吟可以察治忽也其論洞悉本原非明

以來彫章刻句之流所能見及又云後之詩人既以詩自命人亦以詩相屬於是外物爲主而詩役焉詩爲主而心役焉於是無真性情真比興然而情實彌隱詞采彌工義理彌消波瀾彌富而又格律以繩之派別以嚴之時代以區分之回視詩教之本來其然乎其不然乎其論亦切中流弊劉勰所謂古之詩人爲情而造文今之詩人爲文而造情者祖范所言殆庶幾焉然文以載道理不可移而宋儒諸語錄言言誠敬字字性天卒不能與韓

柳歐蘇爭文壇尺寸之地則文質相宐亦必有道矣觀祖范之序而其詩所長所短蓋可以想見也

王良齋集十四卷

江蘇巡撫探進本

國朝王峻撰峻字次山常熟人雍正甲辰進士官至江西道御史是編凡詩十卷文四卷其吳中先哲諸傳則修蘇州府志時所撰亦併附之集中云

鋤經餘草十六卷

侍講劉亨地家藏本

國朝王文清撰文清有周禮會要已著錄此其所作

次定四庫全書總目卷一百八十五

集部

別集類存目十二

六

詩集前有論詩法十條則其平生心得之語而其門人錄以冠集者也

明史雜詠四卷

浙江巡撫採進本

國朝嚴遂成撰遂成字海珊烏程人雍正甲辰進士官雲南知州詠史之作起於班固承其流者唐胡曾周曇皆用近體明李東陽則用樂府體遂成此編賦明一代之事古體近體相間故名曰雜詠嚴震直一首力辨史彬致身錄之誣雖子孫之詞實則公論至於劉三吾一首謂太祖欲立燕王爲三

吾所沮釀靖難之禍不爲無見至周公成王本一家事猶賢於王莽篡句則謬矣姚廣孝二首盛推其功比以蕭何李泌且有特地開科長取士不知漏落幾多人句王越王驥王瓊二首謂三人之交結宦侍乃借其陰助以濟國事非爲身家之計比之郭子儀之俯仰魚朝恩持論皆有意抑揚故翻定案李夢陽一首詞多詆斥併有附記曰北地雖非西涯門人然如王九思以仿西涯體中選其餘諸子多有親承指授者皆奪於北地之焰改轍背之

猶之北地背之也云云夫文章公器各自成家原
非為植黨報恩之地况夢陽與東陽本風馬牛不
相及而忽坐以背東陽之罪尤未免深文鍛鍊踵
明末門戶之舊論矣

絳跗閣詩彙十一卷

浙江巡撫
採進本

國朝諸錦撰錦有毛詩說已著錄是編古今體詩分
三十一集自康熙甲申至乾隆壬午五十九年之
作共一千五百餘篇

賜書堂詩選八卷

編修吳壽
昌家藏本

國朝周長發撰長發字蘭坡別號石帆會稽籍山陰
人雍正甲辰進士選庶吉士散館外補廣昌縣知
縣又改樂清縣教諭乾隆丙辰

召試博學鴻詞授檢討官至侍講學士後降補侍講長
發詩才敏捷操筆即成故富贍有餘而亦微傷於
快平生所作計逾萬首此集八卷蓋汰存十之一
云

小山全彙二十卷

江蘇周厚
培家藏本

國朝王時翔撰時翔字臯謨一字抱翼號小山鎮洋

人雍正戊申由諸生薦舉授晉江縣知縣官至成
都府知府是集凡詩彙八卷詩餘四卷文彙八卷
詩彙分初續後三彙詩餘分五集日香濤日紺寒
日青綃樂府日初禪綺語日旗亭夢囈

就正草一卷

江西巡撫探進本

國朝徐璽撰璽號雷谿進賢人雍正乙酉拔貢是編
乃其文集前題云續刻就正草則必先有初刻今
未之見前有吳士玉序而卷中有祭士玉文殆刻
在序後耶

松源集

無卷數 兩江總督探進本

國朝孫之騷撰之騷所輯尚書大傳已著錄是集凡
五種其題曰松源紀行者初取道富春赴慶元任
作也曰龍泉舟中雜記者歲試至處州作也曰經
說者告諸生五經源流紀也曰敦行錄者與諸生
立條約及經傳雜訓也曰雜文者其酬應之作也
集刻於雍正己酉庚戌閒慶元古松源地故以為
是集之總名焉

春及堂詩集四十三卷

太常寺卿倪承寬家藏本

欽定四庫全書總目卷一百八十五

集部 別集類存目十二

國朝倪國璉撰國璉有康濟錄已著錄是集乃乾隆
王辰其子承寬所刊凡竹立園集一卷南隱山房
小草一卷橘山游草二卷文杏館集一卷浮湍集
一卷楓花草一卷松鱗書屋唱和詩一卷庚子詩
草一卷剡東游草一卷廬江游草二卷西江游草
三卷南游草二卷湖南吟藁二卷燕雲集一卷竹
窗集三卷滇行集八卷春闈詩一卷星沙奉使集
二卷潞河吟一卷庚申南行集三卷嘉蔭書屋集
三卷皆國璉嚴自刪汰惟存其得意之作故每卷

多者不過四十餘首少者或十餘首云

四焉齋詩集六卷附梯仙閣餘課一卷拂珠樓偶鈔二

卷

江西巡撫
採進本

國朝曹一士撰一士字諤庭號濟寰上海人雍正庚
戌進士官至兵科給事中是編乃其詩集石倉世
纂之第四種也附載梯仙閣餘課爲一士繼室陸
氏鳳池作刻於康熙王辰又拂珠樓偶鈔一士之
女錫珪所作刻於雍正甲寅

四焉齋文集八卷

江西巡撫
採進本

欽定四庫全書總目卷一百八十五

集部 別集類存目十

十

國朝曹一士撰石倉世纂之第五種也與其詩集同刻於乾隆庚午其論文之旨謂古文之所以稱古者乃意義之古非詞句之古有明潛溪遵巖荆川震川其文詞之近時者甚多不以此損其古意于麟元美字句之古幾於無一不肖而終與古遠觀其持論可以見其宗旨矣

寒香草堂集四卷

檢討蕭芝家藏本

國朝劉元燮撰元燮字孟調湘潭人雍正庚戌進士官至山西道御史緣事降廣西布政司經歷所著

有耨學齋橐梅垞吟篇什頗多是編古今體詩僅二百餘首乃其晚年所自訂也

金管集一卷

江蘇巡撫探進本

國朝顧成天撰成天有離騷解已著錄其所作詩凡二千餘首嘗以質於蔡嵩嵩為摘其中有關世教者八十三首鈔為此集題曰金管用梁元帝事也花語山房詩文小鈔一卷附三重賦一卷燕京賦一卷

江蘇巡撫探進本

國朝顧成天撰是集乃雍正庚戌辛亥二年成天侍

欽定四庫全書

集部 別集類存目十二

十二

直

內廷時所作花語山房卽

苑外直廬名也凡詩六十八首文二十三首以歲月

先後雜編不分體裁又三重賦一卷成天爲諸生

時恭逢

聖祖南巡所獻燕京賦一卷併自註則雍正癸卯成天赴

京會試時作也

桑弢甫集八十四卷

浙江巡撫探進本

國朝桑調元撰調元有論語說已著錄是集詩十四

卷續集二十卷五嶽詩二十卷文三十卷調元才

鋒踔厲學問亦足以副之故詩文縱橫排奭擺落

蹊徑毅然自爲一家而恃其才學不主故常豪而

失之怒張博而失之蔓衍者亦時有之所作鎮海

樓詩至七言長律二百韻古人無是格也其所以

長卽其所以短乎

柯椽集一卷

待講劉序
地家藏本

國朝周宣猷撰宣猷字辰遠長沙人雍正癸丑進士

官至浙江鹽運通判是集凡雜文五十七篇駢體

及賦亦參錯其間前後亦無序跋似乎未定之槩
其後人錄之成帙也未附陳兆崙所作傳一篇載
宣猷所著尙有史斷史記難字南北史禪眠雲集
禾中雜韻卷施小草諸編集中又有風鈴餘韻自
序一篇亦所作詩集今惟卷施小草及此集存餘
皆未見

雪舫詩鈔八卷

侍講劉亨
地家藏本

國朝周宣猷撰其詩自乾隆辛未迄丁丑分年編次
前七卷名菴施小草後一卷則

南巡紀盛

皇太后萬壽詩各三十首

柳漁詩鈔十二卷

浙江巡撫
採進本

國朝張湄撰湄字鷺洲錢塘人雍正癸丑進士官至
給事中是編分于野雞木輒景演行癡牀海槎帖
懷皖游鷁風壘恥十集湄與金志章厲鶚等以詩
相鏃厲故集中與諸人唱和爲多

秋水齋詩集十五卷

浙江巡撫
採進本

國朝張映斗撰映斗字雪子烏程人雍正癸丑進士

欽定四庫全書

詩部

別集類存目十二

十三

官翰林院編修是編凡十四集首曰或可存集次江上集次釣磯集次雲林集次范湖集次日下集次水籤集次新館集次內舍集次新館後集次舊雨集次清祕集次瀛臺集次使星集皆其子守約守愚所編前有湯右曾序作於康熙乙未蓋其早年即為右曾所賞識也

甯遠堂詩集一卷 侍講劉亨地家藏本

國朝朱成點撰成點字司衡甯鄉人此集其所自編自序有云遷徙流離至庚子疾中閉門卻軌始多

作詩以自遣而集中又有己酉下第詩蓋老於諸生者也

松桂讀書堂集八卷 江蘇周厚堦家藏本

國朝姚培謙撰培謙字平山華亭人喜刻巾箱小本亦好事之士所著有春帆集刻於康熙庚子自知集刻於雍正甲辰樂府及覽古詩刻於乾隆己未此本乃乾隆庚申哀合諸編刪為一集培謙自為之序其諸集序亦仍列之於卷端

舒曉齋存彙三卷 山東巡撫採進本

欽定四庫全書

國朝黃溶撰溶字涪遠鄆城人雍正中貢生是集凡詩二卷詞賦其一卷皆未合古人尺度蓋鄉曲無師之學也

桐陰書屋集二卷 山東巡撫採進本

國朝朱崇勳撰崇勳字彝存號怡園歷城人其詩沿新城末派清脫有餘而深厚不足

湖上草堂詩一卷 山東巡撫採進本

國朝朱崇道撰崇道字帶存崇勳弟也其詩如寒煙依樹澹餘雪傍山明樵聲通澗底人影上蘆花頗

有思致然寥寥數篇不成卷帙

蠶桑樂府一卷 江西巡撫採進本

國朝沈炳震撰炳震有九經辨字瀆蒙已著錄此乃其增歎齋詩集之一種自護種至賽神凡二十首皆七言長句蓋欲以當蠶畢報賽之曲也

無悔齋集十五卷 浙江巡撫採進本

國朝周京撰京字西穆一字少穆錢塘人雍正中諸生是集為同里厲鶚所定分年編次附錄全祖望所撰墓誌銘及同人掃墓詩鶚序以高岑豪健比

之今觀其詩源出劔南在一時詩社中酒旗茗椀
拈韻分題亦足傾倒流輩若方駕古人則又當別
論矣

實懶齋詩集四卷

浙江巡撫
採進本

國朝張時泰撰時泰字平山號六可嘉興人官桐城
縣知縣是集前有時泰自作十懶先生傳頗以曠
達閒適自許傳末系以詩曰懶送窮愁懶顧身懶
趨權貴懶千人懶尋枯句每經日懶作報書恆幾
旬幽賞懶殊辜景物遠游懶已絕風塵懶眠懶起

情如醉十懶先生懶是真其詩格大抵似此也

亦廬詩集二十八卷

江西巡撫
採進本

國朝湯斯祚撰斯祚字衍之號亦廬南豐人雍正中
以歲貢生官江西新昌縣訓導是集以編年為次
其居家則有超遙書堂草茗柯山房草游楚則為
匡廬山草沔陽草泊歸而復出則有茗柯山房後
草崇真禪院草沅湘草充貢以後則有北征燕山
南轅諸草為學官以後則為宐豐草俸滿草回任
草宐豐後草其詩筆力頗爽健惟功候未深耳

芝壇集二卷

山東巡撫採進本

國朝張鵬翼撰鵬翼有芝壇史案已著錄其詩文皆以講學為宗體格多近於語錄

江湖閒吟八卷

福建巡撫採進本

國朝王道撰道字直夫漳浦人官金山縣知縣卷首有黃之雋序稱所著有鹿臯文集有京華彙今未見此集題曰江湖閒吟乃其罷官後寓居朱涇所作其版心則題曰鹿臯詩集蓋其集總名鹿臯以詩文分集而詩集之中此為一種也據所自述初

學李夢陽後乃變以王維陸游然先入者為主矣

慎獨軒文集八卷

浙江巡撫採進本

國朝劉青霞撰青霞字嘯林襄城人雍正中諸生是集皆散體雜文前有王心敬所作小傳稱其酷愛司馬遷班固書未嘗釋手今集中有小傳二卷史論一卷蓋亦畱心史學者也

孱守齋遺藁四卷

江西巡撫採進本

國朝姚世鈺撰世鈺字玉裁號蕙田歸安人平生學問以何焯為宗故全祖望為其墓銘曰蕙田之學

私淑義門義門之徒莫之或先人亦有言墨守太
堅意田不信禦侮兀然每逢異轍互有爭端焦唇
敝舌各尊所聞紀其實也祖望誌又稱馬曰璐馬
曰瑄張四科收拾其遺文開雕又稱所著為蓮花
莊集八卷此本書名卷數皆與誌不合未有張四
教跋稱勒為詩文各二卷則又無所闕佚不知何
故也

蘊亭詩彙二卷

江蘇巡撫
探進本

國朝金縷撰縷字連城先世居廣東縷移居於江南

遂為吳縣人是集為其子祖靜所編前有錢維城
序稱其詩派出自嶺南少年至京師秋日游靈佑
寺有高雲不碍靜晴日自知寒為新城王士禎所
賞又附載舊評數條其一條云才不富卻有氣如
裴旻舞劍非行陣之才而亦能令吳道子長筆力
思不苦卻自深如帝釋天人不能參扣問大迦葉
語亦一一入真法藏語格欲正卻亦別如蜀漢南
唐稱名甚正論其立國固是偏隅亦頗得其似云

翰村詩彙六卷

編修周永
年家藏本

欽定四庫全書總目卷一百八十五

集部

別集類存目十二

十六

國朝仲是保撰是保字羹梅號翰村常熟人是集前五卷爲是保所自編皆題曰行卷第一卷曰辛集第二曰壬集第三曰癸集第四曰甲集第五曰後甲集案唐時進士以所業投贄當路謂之行卷見於摭言等書者頗詳是保終老山林而名所作爲行卷未喻其說又文集以甲乙標目始於文選諸賦其兩集分甲乙者爲李商隱樊南集一集以甲乙分卷者爲陸龜蒙笠澤叢書然皆以十干爲次是集獨以辛壬癸甲爲次亦莫明其故第八卷題

曰遺集則乾隆癸亥是保旅卒於博山其友趙念所續編也是保初學詩於同里馮武武馮班從子也故其詩格律色澤皆馮氏法康熙辛丑復北至益都從趙執信受學故其詩運意鑱刻則純用趙氏法云

梧江雜詠一卷

編修注如藻家藏本

國朝劉雲峰撰雲峰字秋治南昌人是編取梧州風景古蹟爲竹枝詞四十五首各附註其下亦頗詳悉然皆因仍地志之舊文無所考辨

在亭叢彙二十卷

江蘇巡撫採進本

國朝李果撰果字碩夫長洲人在亭其號也是集凡雜文十二卷後附詠歸亭詩鈔八卷果之論文謂弇州北地文古而患乎似義烏延陵文真而患乎淺欲救似與淺之病惟在讀書窮理故所作頗有矩矱而墨守太甚亦未能變化也

樸庭詩彙十卷

編修吳壽昌家藏本

國朝吳燭文撰燭文字璞存一字樸庭會稽籍山陰人雍正中國子監生屢舉不第生平游歷一寄諸

吟咏前四卷其友人嚴遂成所選後六卷則晚年所自訂也

孤石山房詩集六卷

浙江巡撫採進本

國朝沈心撰心字房仲仁和人雍正中諸生早從查慎行游其詩亦頗有查氏法

抗言在昔集一卷

江西巡撫採進本

國朝沈冰壺撰冰壺字心玉山陰人是編皆咏古七言絕句而多考證文史與他家詠古評論事蹟得失者又別其學識頗為拔俗而有意示高或流於

誕如論帝魏帝蜀一條洞見宋人之癥結論蘇氏父子之文自相矛盾一條足關其口論續通鑑綱目諸條皆頗公允論岳飛女銀瓶一條極有根據羊祜周恭帝二條亦頗有推闡至於以司馬遷之先黃老後六經爲是以王充論衡欲藉諸子正經之誤爲識在董仲舒上以莊子荀子爲兩大儒以老子配論語莊子配易管子配書離騷配詩荀子配禮史記配春秋續爲沈氏六經謂管子地員篇班固地理志伯仲禹貢而周禮職方有愧色皆未

免有意駭俗不爲定論其論劔俠傳之諄似矣不知劔俠傳本無是書乃明人鈔太平廣記二卷爲之其論亢倉子爲影撰似矣不知爲王士元所補士元作孟浩然集序自言其始末最明頗爲失考又如

國朝詩人自王士禎朱彝尊田雯梁佩蘭宋琬諸人無一不肆詆排

國朝文人自黃宗羲毛奇齡汪琬姜宸英王源方苞諸人無一不遭指摘或加以醜詈至謂其不堪

供唾且謂此外寥寥自鄙無譏其意欲於百餘年中以第一人自命尤放誕矣

二須堂集二卷

戶部尚書王際華家藏本

國朝丁詠淇撰詠淇字瞻武號棗濱居士錢塘人是集爲詠淇所自編二須者取諸葛亮學須靜才須學語也上卷書十二首序十九首下卷記二首傳六首論二首辨一首說四首題跋五首書事二首家訓十八則其中知希子傳未聞其人意爲自寓之詞歟文雖不甚入古格而頗以扶持名教爲主

集中別有仰編序蓋其筆記又有棗濱詩鈔序爲其詩集今皆未見

雙樹軒詩鈔一卷

編修李中簡家刊本

國朝僧湛性撰湛性一名湛汎字藥根又曰葑菴本丹徒徐氏子居揚州之祇園菴故其詩卷亦自署爲江都初自刻所作爲葑菴集沒後其版散佚此本乃乾隆壬辰所重刊也其詩宗法王士禎惟沿溯於士禎唐詩十選之中故結體修潔時有雋語如所謂春風拂禪衣流鶯啼樹杪二月青滿林百

花開已早者亦頗近自然然骨力未堅興象頗淺
十首以外語意略同蓋聰明多而學問少故流連
光景所就止於如斯耳

香域內外集十二卷

兩淮馬裕
家藏本

國朝釋敏膺撰敏膺蘇州花山翠巖寺僧是集乃其
弟子聖藥等所編外集詩文凡七卷內集五卷皆
語錄偈語蓋釋家以釋為內學儒為外學耳

敲空遺響十二卷

內府
藏本

國朝僧如乾撰如乾字愍休四川人嘗主陝西興善

燉煌等寺是集凡雜文八卷詩四卷

餐秀集二卷

浙江巡撫
探進本

國朝黃千人撰千人字證孫餘姚人宗羲之孫百家
之子也官泰安縣丞是集為其同官覺羅普爾泰
所刊前有普爾泰序又有顏懋价序引嚴羽王士
禎之說訾警館閣之士以抒其憤懣价字介子曲
阜人以貢生官肥鄉教諭老而不第故其詞如是
云

梯青集

無卷數
蕭芝家藏本
檢討

欽定四庫全書總目卷一百八十五

集部

別集類存目十二

三五

國朝項大德撰大德字立上漢陽人刲股療母不愈
以哀毀卒是集凡賦二十七首詞四十一首吐屬
頗韶秀而得年僅二十有六功候未深故骨格未
能成就焉

月湖贍橐一卷

江西巡撫
探進本

國朝王樛撰樛有讀畫錄已著錄是集僅文二十四
首又多小品蓋猶明季山人之遺風鈔本題曰月
河贍橐考集內所居丙舍地名皆作月湖樛別有
讀畫錄亦載張庚爲作月湖圖則卷首月河字鈔

本誤也

夢村集二卷

編修周永
年家藏本

國朝朱緯撰緯字義俶歷城人由歲貢生官邱縣訓
導是集有七十自壽詩又有次兒生日詩作於七
十四歲時蓋其晚年所自編詩頗清淺而時有脫
灑之致

後海書堂遺文二卷

江蘇巡撫
探進本

國朝王孝詠撰孝詠有嶺西雜錄已著錄是集上卷
爲雜文下卷皆金石題跋文頗質實而少覺其樸

欽定四庫全書總目卷一百八十五

集部

別集類存目十二

二函

惟題跋則品題不苟可取者多

薇香集一卷燕香集二卷燕香二集二卷

內閣中書方維甸家藏本

國朝方觀承撰觀承字遐穀號問亭又號宐田桐城人由監生薦授中書舍人官至直隸總督諡恪敏觀承遭遇

聖朝備蒙

恩眷封疆宣力積有勤勞而性嗜詩篇政務之餘不廢吟詠舊所著有東園剩橐入塞詩懷南草豎步吟叩舷吟宐田彙橐看蠶詞松漠草共八種皆編入

述本堂詩集中已別著錄是編三集則其為直隸

總督時所作其子維甸編錄別行者也

晚晴樓詩草二卷

大理寺卿陸錫熊家藏本

國朝曹錫淑撰錫淑字采荇上海人兵科給事中一士之女適同里舉人陸正笏一士有四焉齋詩集其妻陸鳳池亦有梯仙閣餘課錫淑承其家學具有軌範大致以性情深至為主不規規於儷偶聲律之間云

藍戶部集二十六卷

江西巡撫探進本

欽定四庫全書總目卷一百八十五

集部別集類存目十二

國朝藍千秋撰千秋字長青定黃人以薦授國子監
學正官至

盛京戶部員外郎是集刻於乾隆丙寅凡詩四卷文
二十二卷

豐川全集二十八卷

內府藏本

國朝王心敬撰心敬有豐川易說已著錄此集乃所
作語錄及雜著大抵講學者居多乃康熙丙申湖
廣總督額倫特所刊額倫特即嘗以隱逸薦心敬
者也

豐川續集三十四卷

陝西巡撫採進本

國朝王心敬撰據其子勅凡例稱心敬康熙丙申刻
有正續集二十八卷是已有正續兩集矣又稱自
丙申至乾隆戊午與當代大人君子相酬答及與
門人子弟講說論辨者視前刻倍多今裒成三十
四卷是此本又出續集後矣然其二十八卷之本
實不分正集續集之目未喻何說故此本仍刊版
之名以豐川續集著錄焉

綠筠軒詩四卷

編修周永年家藏本

國朝張元撰元字殿傳淄川人雍正丙午舉人官魚
臺縣教諭元爲崑崙山人篤慶從子故詩法本王
士禎之論以神韻爲宗晚乃漸歸朴老而終未忘
其故轍是集凡七百餘首其孫庭案所刻也

質園詩集三十二卷

編修程晉
芳家藏本

國朝商盤撰盤號蒼雨又號寶意會稽人雍正庚戌
進士官翰林院編修以養親乞外補改授同知終
於元江府知府盤與錢塘厲鶚名價相埒才情富
贍生平篇什甚多此集乃刪汰之餘尙三千首云

竹香詩集四卷

大理寺卿陸
錫熊家藏本

國朝席鑿撰鑿字景溪常熟人雍正巳酉舉人官內
閣中書鑿爲吳偉業外孫於詩法頗有端緒此集
凡詩三百餘首乃其友杭世駿所刪存也

冰壑詩鈔六卷

編修周永
年家藏本

國朝朱令昭撰令昭字次公歷城人少與淄川張元
膠州高鳳翰等結柳莊詩社繪畫篆刻皆能畱意
其詩亦與鳳翰相伯仲而少遜其雄傑

鷺浦集六卷

編修周永
年家藏本

次吉甫集

集部

別集類存目十二

三七

國朝朱懷樸撰懷樸字素存歷城人其詩格近宋人

而時有風致

菱溪遺草一卷

編修程晉芳家藏本

國朝蔣麟昌撰麟昌字靜存陽湖人乾隆己未進士

官翰林院編修年僅二十有二而歿遺詩數十篇

其父原任倉場侍郎炳為刻而傳之

松泉詩集六卷

編修程晉芳家藏本

國朝江昱撰昱有尚書私學已著錄其平生喜為韻語與編修程夢星等相唱和游蹟多在衡湘間是

集即刻於湖南者也

閨房集一卷

編修程晉芳家藏本

國朝陳珮撰珮字懷玉天長人江都諸生江昱之妻

是集僅詩四十首長短句十首附以傳誄及昱所

作墓碣

白雲詩集七卷別集一卷

兩江總督探進本

國朝盧存心撰存心原名琨字玉巖別字敬甫錢塘人恩貢生乾隆元年嘗薦舉博學鴻詞是集首以文廟從祀弟子贊八十首殿以詠梅七言律詩八

十五首前有桑調元序稱為總角交其才氣亦調元之亞也

萬青樓詩文殘編一卷

國子監助教張羲年家藏本

國朝邵昂霄撰昂霄有萬青樓圖編已著錄所著詩文名萬青樓橐身後散佚是編為其從子是相所手錄僅存文數篇詩數首而已

隨園詩集十卷附錄一卷

御史戈源家藏本

國朝邊連寶撰連寶字趙珍今刊本作肇畛乃戲以同音書之如申涵光本字符孟而每書彙盟非其

本字也任邱人雍正乙卯拔貢生乾隆丙辰薦舉博學鴻詞辛未又薦舉經學是集前有乾隆丁丑戈濤序而第四卷以下題曰病餘草者乃皆戊寅以後詩蓋續編而仍冠以原序也附錄一卷曰禪家公案頌則其晚耽禪悅讀指月錄所作云

隱拙齋集五十卷

浙江巡撫採進本

國朝沈廷芳撰廷芳有十三經注疏正字已著錄是集為廷芳所自編凡詩賦三十二卷散體文十八卷其詩學出於查慎行古文之學出於方苞故所

作雖無鉅麗之觀而皆有法度

東山草堂集六卷

江西巡撫探進本

國朝潘安禮撰安禮字立夫南城人乾隆丙辰

召試博學鴻詞官翰林院編修是編皆其官京師時所

作律賦凡三十九首其門人為註而刻之

黃靜山集十二卷

江蘇巡撫探進本

國朝黃永年撰永年字靜山江西廣昌人乾隆丙辰

進士官至常州府知府是集前有雷鉉所作墓誌

銘稱所著有希賢編春秋四傳異同辨崧甫文類

南莊類稿白雲詩鈔靜子日錄此本僅有南莊類

稿八卷白雲詩鈔二卷奉使集一卷靜子日錄一

卷而他集不見其春秋四傳異同辨今在南莊類

稿第二卷中亦不別為書未喻其故又一別本僅

有南莊類稿奉使集靜子日錄三種疑其隨刻隨

印皆非完本云

山陰集一卷歸田遺草一卷

編修鄭際唐家藏本

國朝林其茂撰其茂字培根侯官人乾隆丙辰進士

官山陰知縣此二集一為官山陰時作一為罷官

欽定四庫全書總目卷一百八十五

集部

別集類存目十二

三

後作其茂沒後其婦弟鄭天錦所編冠以魯曾煜所作家傳又有沈廷芳序惜其邁疾早世未克竟其所長蓋其茂沒時年僅三十有九云

史復齋文集四卷

陝西巡撫採進本

國朝史調撰調字勻五號後齋晚號雲臺山人華陰人乾隆丙辰進士官仙游縣知縣是集一卷爲其官仙游時稟諭及荒政義倉等略二卷爲序跋書論三卷爲橫渠書院規諭及諭子書而以仙游所定求士三則冠焉四卷爲語錄及功過式併以崔

紀所作誌銘附於其後

瑜齋詩草一卷

庶吉士盧遂家藏本

國朝郭趙璧撰趙璧字名瑾侯官人乾隆丙辰舉人是集乃趙璧沒後其子文煥所編後其子文海又搜求佚藁附益之凡古今體詩一百十一首蓋趙璧喜吟詠而不自收拾故散失之餘所存僅此云

卓山詩集十二卷

江西巡撫採進本

國朝帥家相撰家相字伯子奉新人乾隆丁巳進士官至潯州府知府是集又名三十乘書樓集中多

改竄之處蓋猶其自訂之原本也

瓠息齋前集二十四卷

浙江巡撫探進本

國朝凌樹屏撰樹屏字保釐烏程人乾隆己未進士官鳳縣知縣調咸陽後改補嘉興府教授是集賦一卷詩二十三卷分十二集大抵才情奔放之作

問義軒詩鈔二卷臚草一卷

國子監助教張義年家藏本

國朝莊綸渭撰綸渭字對樵號葦塘武進人乾隆壬戌進士官定海縣知縣是集為綸渭所手定其子世駿校刊臚草乃其在定海時所著雜文及案牘

已載入定海續志又別錄成帙附於詩集之後焉

詠史六言一卷

侍講劉亨地家藏本

國朝周宣武撰宣武字燮軒長沙人乾隆壬戌進士是編雜採史事以六言絕句評論之或一首詠一事或一首連類兩三事不分門目亦不敘時代後先每首之末各附論一篇六言一體古今作者頗少詩家偶一為之避其難也宣武獨衍至百首以外意欲聞道出奇然終不能見長也

月坡詩集四卷

福建巡撫探進本

欽定四庫全書

集部 別集類存目十二

三

國朝郭植撰植有經史問已著錄是集分四編一曰雪竹草堂集一曰北游集一曰臺江草一曰溫陵草以集中編年考之迄於辛酉蓋其鄉試中式之後所刊也

玉芝堂集九卷

江蘇巡撫採進本

國朝邵齊燾撰齊燾字荀慈昭文人乾隆壬戌進士官翰林院編修是集凡詩三卷文六卷乃其晚年所自定詩文皆不分體大抵駢偶之作爲多爲四六之文者陳維崧一派以博麗爲宗其弊也膚廓

吳綺一派以秀潤爲宗其弊也甜熟章藻功一派以工切細巧爲宗其弊也刻鏤纖小齊燾欲矯三家之失故所作以氣格排奡色澤斑駁爲宗以自拔於蹊徑而斧痕則尙未渾化也

嬾真初集詩選八卷

江蘇巡撫採進本

國朝張用天撰用天字用六號誠菴婁縣人是集刻於乾隆甲子有用天自序其詩氣體勻整而捶字往往未堅句法亦多沿襲如板橋吟中紅歸水上桃花簇青入煙中柳葉齊則直點竄杜甫句矣

欽定四庫全書

集部 別集類存目十二

燕川集六卷

江蘇巡撫
採進本

國朝范泰恆撰泰恆字無厓河內人乾隆乙丑進士
改庶吉士外補崇義縣知縣此集皆其所為古文
後附其祖父墓表祖母壽序皆他人作而未又綴
以泰恆代文六篇編次不倫疑墓表壽序即泰恆
自作嫁名於人後仍收之集中耳然究非體例也

傲帚集二卷附蘆中集一卷

國子監助教張
義年家藏本

國朝趙秉忠撰秉忠字景光號秋墅興化人乾隆乙
丑進士改庶吉士未散館而卒是集皆古今體詩

未附蘆中集乃哭其子春祈而作也

凝齋遺集八卷

江西巡撫
採進本

國朝陳道撰道字紹洙號凝齋江西新城人乾隆戊
辰進士是集為其子守誠等所刊凡文六卷詩二
卷中頗多講學之作

柘坡居士集十二卷

浙江巡撫
採進本

國朝萬光泰撰光泰字循初秀水人乾隆庚午舉人
是集其所自定卷一曰南村草堂集卷二曰樂于
集卷三卷四曰聞魚閣集卷五曰北郭草堂集卷

欽定四庫全書

集部 別集類存目十二

六卷七日江船集卷八日聞魚閣續集卷九日觚
屋集卷十日江船續集卷十一日五上春司集卷
十二日青乳軒集前有汪孟錫序稱循初計偕北
上以病卒方病中嘗自定詩十二卷一緘寄余有
可存則付令子存之不者燬之之說又稱刻既成
取循初別字題曰栢坡居士集其古文詩餘極夥
聞手自燬去外雜著十六種則皆其自定緘寄者
俟他日續刻云云蓋光泰才思富贍篇什頗多後
乃悔其少作所存止此也

浩波遺集三卷

庶吉士梁上
國家藏本

國朝鄭際熙撰際熙字大純侯官人乾隆丙子舉人
年三十六而卒是集爲其弟際唐等所刊凡詩二
卷文一卷文中有杜律篇法序一篇稱能詩者未
嘗先言法而自中法且神而明之變化以自成其
法未有案一定之科條而譜之舍其性情才力俯
首以從法也其論亦足破拘攣之說其書則未之
見也

觀光集五卷

浙江巡撫
採進本

欽定四庫全書

集部

別集類存目十二

三五

國朝蔡以封撰以封字桐川嘉善人由優貢生官桐
卿訓導是集凡古今體詩八十五首擬樂府四十
六首皆其監敷文書院恭逢

聖駕南巡率諸生迎

駕時所賦也

綠杉野屋集四卷 浙江巡撫
採進本

國朝徐以泰撰以泰字陶尊德清人國子監生乾隆
二十二年官陽曲縣知縣其詩皆早年之作故骨
格未就而時有雋句如詠鷹翎扇附人終在手斷

翻尚生風一聯亦頗工點染也

強恕齋文鈔五卷 浙江巡撫
採進本

國朝張庚撰庚有通鑑綱目釋地糾繆已著錄庚少
孤貧賣書養母以餘力為古文是集乃其七十三
歲所自編中傳誌之文居十之七多述忠孝節義
之事

冬心集四卷 江蘇巡撫
採進本

國朝金農撰農字壽門錢塘人客於揚州書畫皆以
奇逸自喜詩亦如之其名冬心者取崔國輔寂寥

抱冬心之語也

產鶴亭詩集七卷

浙江巡撫探進本

國朝曹庭棟撰庭棟有易準已著錄是集凡分七彙每彙各為小序其書齋中有產鶴亭因以名集故集中詠鶴詩最多其第二彙別題曰魏塘紀勝第七彙亦別題曰續魏塘紀勝蓋嘉善舊隸嘉興路為魏塘鎮亦名武塘明宣德五年始析為縣庭棟先詠其名蹟為一百首又續成五十首也

西澗草堂集四卷

編修周永年家藏本

國朝閻循觀撰循觀有尚書續記已著錄是編其所著古文也其文謹嚴頗不苟作循觀沒後其同學韓夢周為搜輯編次序而刊之僅五十七篇

嶺岨山人集八卷

禮部主事任大椿家藏本

國朝汪舸撰舸字可舟婺源人流寓揚州性不諧物偃蹇貧病以沒是集為舸所自定斷自五十歲以後乾隆庚寅杭世駿為之序併附錄世駿與沈沃田書盛稱其和丁隱君貝葉經歌長春觀老子像絕句云

金匱山房集卷之二十一
曉巢集六卷後集一卷

江西巡撫
採進本

國朝李鐙撰鐙有尚史已著錄鐙卜居盤山優游泉石以終故其詩意思蕭散挺然拔俗大都有古松奇石之態而刻意求高務思擺脫亦往往有劖削骨立斧鑿畱痕較王世貞所謂高叔嗣詩如空山鼓琴沈思忽往木葉盡脫石氣自青者則猶有一閒之未達蓋可以著力之處精思者得之不容著力之處精思者反失之也第一卷皆擬古樂府古人音節既不可得乃詰屈其詞以意爲之題下所

註如朱礪下註曰建鼓殷所作棲翔鷺於上或曰鷺鼓精此吳兢解題本說也臨高臺下註曰趨帝鄉而會瑤臺也借寓游仙已非原解雉子斑下註曰關雎之類則純非古題之意又不知其寓意所在卷中大抵類此殊不可解也

石閭詩一卷

江西巡撫
採進本

國朝陳景元撰景元號石閭鑲紅旗漢軍生平作字效晉作詩效漢務欲自拔於流俗之上是集乃其手書擬古詩六十餘首以貽雷鉉者前有短札亦

其手書鉉竝鈎摹筆蹟刻之紙版頗為精好景元詩雖以漢為宗而性既孤僻思復刻峭結習所近乃在孟郊賈島之間如米摹晉帖矩度不失二王而波勒鈎剔乃時時露其本法於漢人不彫不琢之意未能全似也此本以篇頁較少不能成帙舊附於李鐸睫巢集以行然二人同時唱和名亦相齊未可列諸附綴故仍各著於錄焉

南阜山人詩集七卷

山東巡撫採進本

國朝高鳳翰撰鳳翰字西園晚自號南阜山人又曰

歸雲老人膠州人嘗以縣丞署鹽大使患風痺罷歸卒鳳翰工於書畫筆墨脫洒不主故常風痺後右臂已廢乃以左臂揮洒益疎野有天趣閒作詩歌不甚研鍊往往頽唐自放亦不甚局於繩尺然天分絕高興之所至亦時有清詞麗句故少時以詩謁王士禎極稱賞之生平所作凡三千餘首日擊林集曰湖海集曰岫雲集曰鴻雪集曰歸雲集曰歸雲續集曰青蓮集晚年貧病且死自跋其後曰盲子頑孫篋笥誰付不知後來所作尚復幾

許亦不知得成卷與冊否尙有人拾取於蛛絲蠹腹之餘以少得流傳於人世否露電茫茫老病日篤死且不知何時而猶惓惓於此故紙窠中物愚哉南阜不直達人一笑矣其志亦可哀也

拙齋集一卷

編修周永年家藏本

國朝李遠撰遠字君宏益都人是集皆五七言近體吐屬亦頗恬雅其刊版字畫悉從說文以小篆改隸詭形怪態則殊爲好異

密娛齋詩彙一卷

編修周永年家藏本

國朝鄧汝功撰汝功字謙持聊城人乾隆乙未進士傳臚後卽病歸未及釋褐而卒是集乃其友桂林府同知李文藻所刊文藻序稱其古體出於韓蘇近體似錢郎皆非止境蓋其天分頗高而得年不永功候則尙未成就云

放鶴村文集五卷

山東巡撫採進本

國朝張侗撰侗字同人一字石民諸城人是集前有方邁所作侗小傳稱其有孝行多奇節蓋亦孤高之士其文則欲擺脫町畦乙乙冥冥別標象外之

趣而反墮公安竟陵派中蓋存一不落窠臼之意
卽其窠臼矣

東坪集八卷

浙江巡撫
採進本

國朝胡慶豫撰慶豫字離來號東坪平湖人歲貢生
是集卷一曰南浦吟客江右時所作卷二曰昭陽
小稟客邗江時所作卷三曰北征集赴京道中及
寓京師時所作卷四卷五曰西征草入關中及流
寓西蜀時所作卷六卷七卷八曰桐軒集則里居
所作也其詩以雅淡爲宗而未能超詣

六湖遺集十二卷

浙江巡撫
採進本

國朝張文瑞撰文瑞字雲表六湖其號也蕭山人官
青州府同知其詩凡分十八集其私印曰少陵私
淑又曰五言長城自命頗高所作則大抵以秀潤
爲工也

念西堂詩集八卷

陝西巡撫
採進本

國朝王令撰令字仲錫渭南人由拔貢生官至廣東
按察使是編分金石絲竹匏土革木八集自序謂
皆適性自樂之言蓋沿波鍾譚全非慶陽武功以

來秦中舊格矣

古雪堂文集十九卷

浙江巡撫
採進本

國朝王令撰是編乃其所著雜文詞多蹇澀似沿其鄉文翔鳳餘派又好用釋典頗雜宗門語錄所作詩話如紀隴西施妙玉在冥中代高素臣作詩還魂遂爲夫婦事亦多類唐人說部也

有蘭書屋存彙四卷

江蘇周厚
培家藏本

國朝石球撰球字鳴虞嘉定人其近體詩頗有風致而骨格未堅徐樹紳序稱球自以生平蹤蹟少所

涉歷無瑰偉奇特之觀故亦罕沈博絕麗之作可謂自知矣

寒玉屏集二卷碎金集二卷

浙江巡撫
採進本

國朝閔南仲撰南仲字湘人號石漁湖州人其詩以新穎爲宗體格頗近金元

薪槲集四卷

江蘇巡撫
採進本

國朝許昌國撰昌國字仔賡原字一清荆溪人歲貢生是書首雜著次論學次論古次課徒訓兒各爲一卷大抵皆語錄之類後集一卷則附錄也未有

其子重炎所作年譜案其事狀蓋亦篤行好修之士故集中講學之語多能切實近理特不以著作見長耳

璞堂文鈔十一卷

江蘇巡撫探進本

國朝許重炎撰重炎字少來荆溪人是集多講學之文而持論平允無喧爭門戶之習於忠孝節義尤矐矐表章亦非空談性命自號聖賢者流文則縱橫曼衍惟意所如不能一一入格也

禹門集四卷

內府藏本

國朝郭振遐撰振遐字中洲汾陽人寄居揚州詩頗率易至以大禹顏回自比尤爲狂縱矣

彙書六卷

浙江巡撫探進本

國朝王鳳九撰鳳九仙游人是集自序謂做笠澤叢書之例故以彙書名之中多講易之文其說皆宗程朱詩則有韻語錄也

天門詩集六卷文集六卷

內府藏本

國朝吳盛藻撰盛藻字觀壯和州人由拔貢生官至廣東按察司副使其詩文皆惟意所如罄所欲言

而止

歲寒堂存彙一卷

浙江巡撫採進本

國朝林璐撰璐字鹿菴錢塘人是集皆其所著雜文僅數十篇相其版式蓋陸續開雕尚未編定成帙其安溪懷古序信建文出亡為真殊為未考所記顏允紹郭少尹等事皆足裨史之闕特敘述稍冗筆力稍弱耳

天香閣詩集十卷

浙江巡撫採進本

國朝唐之鳳撰之鳳字武曾烏程人其詩多愁苦之

音擬古諸作亦頗具體然未能變化未附碎玉合編二卷一題唐雲禎予霖著一題唐德遠深源著蓋之鳳兄弟行也

笑門詩集二十五卷

內府藏本

國朝戚珥撰珥字後升泗州人由優貢授知縣所作好為新語公安竟陵之流派也

偶存草堂集六卷

山東巡撫採進本

國朝林之雋撰之雋字素園楊夢琰序稱其產於魯客於楚其自署曰孝感蓋寓籍也其取法在中唐

南宋之閒而學力則未逮焉

右別集類一千五百六十七部一萬七千六百十

四卷

內六十六部無卷數

皆附存目

欽定四庫全書總目卷一百八十五

南海譚懋安初校
南海廖廷相覆校

百九